



## Muƙe B. Egedes nytårstale

**Taler**

Múte Bourop Egede  
Formand for Naalakkersuisut

**Dato**

1. januar 2022

**Sted**

Hans Egedes Hus, Nuuk

**Omstændigheder**

Talen blev TV-transmitteret direkte på KNR (Kalaallit Nunaata Radioa).

Asasakka ataqqinartut nunaqqatit. Ukiortaami uummammit pisumik pilluaritsi.

Ukiup taarnerpaaffia qaangiukkaluttuarpoq. Ullukinnerup juullillu ulluisa nalliussineratigut ilaqutariittut inuiattullu asanninnermik ataasimoornermillu qanortoq misigisaqarsimagisa.

Ullunut aggersunut - Siunissamut - Nukissanik tunngaviliiffiusumik.

Ukioq 2021 pisoqarfiusimaqisoq qaangiussimalerpoq. Ukiortaarlu 2022 maanna tikilluaqqullugu aallartippoq.

Ukiummi taarnerpaaffianiit qaamaneq annertusiartoqqilersoq maanna ikaarsaarfigaarput. Qaamarnup ukiortaallu nassatarisarpaa neriunneq.

Ukiortaaq 2022, illit uangalu - Tamatta - Inuiattut ilusilersuiffigissallugu periarfissaqarfipput.

-0-

Kulturilerisortatta, timersortartut peqatigiiffilerisullu - Inuiaqatigiinni ataasimoornermik annertuumik misigitittarpaatigut.

Timersortartuvut takutitsilluartut tulluusimaarutigisavullu ukiumi qaangiuttumi arlaqaqaat. Immikkulli eqqaasaqarusuppunga.

Inuiattut ataasimoorneq, arnat assammik arsartartortatta amerikap

nunavittaani, nunarsuarmi pissartanngorniunnissamut anngunniunneranni aasaq misigaarput. Naak nunarsuarmi pissartanngorniunnissamut anngutinngilaaraluartut. Tulluusimaarneq misigaarput, nunarsuamimi nunat angisuut, inuttoqisut naligalugit – Ilami allaat ajugaaffigisarlugit takutitsipput.

Kulturilerisut akornanni nunarput nittarsaalluarneqarlunilu, inuiattut ataatsimoornissatsinnut tunngavissiisumik kiisalu oqaasinnguiffigisariaqakkatsinnik oqaasinnguilluni nikisitsisinnaaneq takutinneqarportaaq.

Atuakkiortup inuusuttup, Niviaq Korneliussenip Nunat Avannarliit Atuakkiortunut nersornaasiuttagaannut, nunatsinniit siullerpaalluni nersorneqarnera tulluusimaarutissaraarput.

Tulluusimaarnittali aamma malittaani atuakkiata, 'Naasuliartarpi'-p, inuiaqatigiinni unammilligassatta iliuuseqarfigisariaqakkattalu ilaannik, imminut toquttarnerup qaangerniarnissaanut oqariartuuteqarnera maluginngitsuugassaangilaq.

Unammilligassaq inuiattut ataatsimoornikkut tapersersoqatigiinnerunikkullu aatsaat anigorsinnaavarput. Immitsinnut nukittunerulersittarpugummi akiugassaajunnaarluta, ataatsimoorangatta tapersersoqatigiikkaangattalu.

-0-

Ukiuni makkunani nunarsuarmi ilaqutariippassuit nualluussuarmik Covid-19-imik tunillatsinnikkut aqquusaagaarput.

Ilaqutariit ilissittaarlu meeqqat nualluussuarmik nalaataqarnitsinni anaanamik, ataatamik qanigisannulluunniit allamut, nualluussuup tuniluunnerani qanoq misiginerlusi oqaatiginissaa pingaaruteqarpoq.

Anaanap, ataatap qanigisavilluunniit nalunngilaa qanoq tunillatsinnaveersarneq pissanersoq, annilaangaguillu inersimasumik oqaloqateqarit.

Nualluussuup atuunnerani eqqaasinneqarpugut ikioqatigiinnerup qanoq pingaaruteqassusaanik.

Nunaqqatigiittut ilaqutariittullu ikioqatigiinneq nukimmik tunisisarpoq ataatsimoornerulersitsisarlungu. Tamanna eqqaasitsivoq nunatsinni immitsinnut ikiussagutta iliuuseqassaguttaluunniit, illit uangalu tassatugaasugut iliuuseqarsinnaasut.

Nualluussuaq sulii nunarsuatsinni tuniluuppoq, pisortallu innersuussutaat sulii atuupput.

Nunatsinni inooqateqarpugut sumiiffeqarporlu nakorsaqaqfiunngitsunik, taakkualu nualluussuarmut illersussagutsigit tamatigut mianersortumik iliuuseqartuartaqarpugut.

Nualluussuup nunarsuarmi tuniluunnera malinnaavigaarput, nunatsinnillu tuniluutinninnissaa peqqinnissaqarfittalu artukkinnginnissaa siunertaralugu tuniluunnerup siuaruatsaaliornissaanut iliuuseqartarnerit ingerlassapput.

Nunaqqatigiittut paaseqatigiilluta nualluussuaq akiortigu, inuttullu ataasiakkaatut akisussaaffimmik tigusilluta sapinngisarput tamaat tuniluunneq pinaveersaartitsigu.

-0-

Ukiumi qaangiuttumi naalakkersuinikkut allannortoqarpoq. Innuttaasut qinersineranni naalakkersuinikkut nikittoqarpoq tassanilu innuttaasut taasinerikkut naligiinneruneq minnerunngitsumillu ataatsimoornerunissaq kissaatigigigaat erserpoq.

Tamanna Naalakkersuisuniit ataqquilluinnarlugu pimoorullugulu ingerlatissavarput. Akuutitsineq ataatsimoorfeqarnerlu salliutissavagut isummallu assigiinngissuseqarsinnaaneri ataqquillugit naaperiaarfiusinnaasunik nassaarsinnaaneq anersaaralugu ingerlatsineq qitiutillugu, naalakkersuinikkut ingerlaaseq atussavarput.

Tamanna Aningaasanut Inatsisiliornitsinni takussutissineqareerpoq. Nunatta aningaasatigut toqqammavissaa tamakkiisumik ilalerneqarpoq. Taamaallitalu tamanit tunuliaqutserneqartumik siunnerfeqarluta.

Ataatsimoorneq nukittuunngortitsisarpoq taamaattumillu Inatsisartuni partiit tamaasa ammasumik suleqataalluarsimanerannut qujaffigerusuppakka suliassanullu aggersunut suleqatigiinnissatsinnut isumalluarlungalu qilanaarpunga.

Unammilligassagummi annertoqaat. Naligiinnerulernissarput qitiulluinnarpoq. Naligiinnerulernissatsinnullu allannguisariaqarneq pisariaqarluinnarpoq. Naligiinnerulernikkut inuiaqatigiinni toqqissisimanarnerusumik ingerlaaseqarsinnaanerput tunngavilisissavarput.

Ilaqutariittullu toqqissimaneq qitiulluinnarpoq. Inuiaqatigiittut tamanna angussagutsigu pingaaruteqarluinnarpoq ineqarnikkut, inooqatigiinnikkut ataqqeqatigiinnikkullu siuarsaanissarput. Ilinniartitaanerup siammasissup qaffassarnissaa pingaaruteqarluinnarpoq. Inuiaqatigiinni pisariaqartitagut piginnaasatta ilinniartitaanikkut tunngavilerneqarnissaat pisariaqarpoq. Taamaaliornitsiugut suliffeqarnikkut toqqissisimaneq annerusoq pilersissinnaavarput inuttullu ataasiakkaatut imminut ilaqutariittullu pilersorsinnaanerput qaffassarsinnaallugu – inuuniarnikkut ineqarnikkullu.

-----

Naligiinneruneq assigiinngitsunik ersiuteqartarpoq. Naligiinneruneq tassaavoq tamatta inuiaqatigiinni qanorluunniit atugassa qaraluarluta toqqissilluta inooqataasinnaanermut periarfissaqarneq. Tamatta assigiimmik tunniussa qarsinnaanngilagut. Ilaqarpugut ikorfartorneqartariaqartunik. Ilaqarpugut tapersorneqartariaqartunik. Ilaqarpuguttaaq inuunerminni sulinerikkut tunniussa qarsimallutik toqqissillutik utoqqalisariaqartunik. Inuiaqatigiittut tamanna ataatsimoorluta suleqatigiiffigisigu, Naalakkersuisunilu tassunga siuttooqataassaagut...

Aallartererpugut. Utoqqarnut atugassarititaasut pitaanerulernissaannut Naalakkersuisuniit siunniussarput Partiit tamarmik taperserpaat. Tamannali allorianerit siullersaraat.

Ukiumi nutaami inuiaqatigiit siuariartornissaannut allorianerit tullii tigusariaqarpagut. Ineqarnermut aqqissuusseqqinneq arloriarnerit pingaarnerpaat ilagivaat.

Angerlarsimaffimmi tassaavoq inuunitsinni toqqissimaffissat pingaernerpaat ilaat.

Qulaajaanit ingerlanneqareerput maannakkullu pilersaaruserluakkamik ineqarnerup aaqqiissuuteqqinnissaa tullinguukkaluttuarpoq.

Inuit namminerisamik ineqarsinnaanerannut periarfissat eqaallisarnissaat suliarissvarput. Inuit qanorluunniit inuiaqatigiinni inissisimagaluarpata angerlarsimaffeqarnissaat anguniarlugu suleqatigiittariaqarpugut. Inuit angerlarsimaffeqangitsutut inissisimalertarnerat pinngitsoortinniarlugu ataqatigiissumik ataatsimoorluta suliarisariaqarparput.

Inuit, peqatigiiffiit, suliffeqarfiit aammalu suleqatigiiffiit inunnik annikilliuqartunik aammalu inissaaleqisunik ikuiuisut tapertaalluartullu piffissaq manna iluatsillugu qamannga pisumik qujaffigerusuppakka. Ilissi takutipparsi ataatsimoorluni nukik qanoq annertutigisoq pillersinneqarsinnaasoq.

----

Angerlarsimaffik tassaasussaavoq meeqqanut toqqissimanartumik perorfiusoq. Meeqqap angajoqqaani tamatigut pisariaqartipai taakkuummatami inuunerup aqutissaanut ilitersuisussat asanninnermillu tunniussisussat pingaernerpaat.

Tamanut tamanna angussagutsigu angerlarsimaffinni qanigisanut tarnikkut timikkullu annersaaanerit annikillisartariaqarpagut-  
Akuersarneqarsinnaangillammi. Timikkut tarnikkullu annersaaanerit pillugit suliniutit arlalissuit ukiut ingerlanerini ingerlanneqartarsimapput qujanartumillu sulisut namminerlu kajumissutsiminnik suliniuteqartut inunnut ataasiakkaanut tapertaanermikkut ilorraap tungaanut alloriatitsisinnaasarsimapput. Inunnik sullissisut aammalu nammineq kajumissutsiminnik inuit artorsaruttorfiini tapertaasartut tamaasa qamannga pisumik qujaffigerusuppakka ukiumilu nutaami nukissaqarluarlutik sulinissaannut kissaallugit.

Malunnaateqarluartumik qanigisanut timikkut tarnikkullu annersaaanerit annikillisinneqassappata isertuaatsumik oqaasinnguisariaqarneq pingaaruteqarluinnarpoq. Ajoraluartumik inuunermi anniaatinut

oqaasinnguisarnerput pikkoriffiginngilarput. Isertorneq matoorinerlu ilaatigut ajornannginnerusutut isigilersoorsimasarparput. Tamanna tamatsinniippoq. Pikkoriffigivallaarparput inoqatitta ajornartorsiutaat uparuassallugit kanngunarsassallugillu. Tamanna toqqorterinermik, kanngusunnermik, aliasunnermik kamassaqalernermillu kinguneqartarpoq.

Qanigisani timikkut tarnikkullu annersaanerup akiornissaani tamatta peqataasinnaavugut tunniussaqaarsinnaallutalu. Ikioqqusut assuarlernagit aqqutissioqatigalugit.

Ilikkartariaqarparput qanorluunniit ukioqaraluarutta ikiorneqarnissamik oqaasinnguisinnaaneq ikoqqusinnaanerlu inuunermmi ingerlaqqinnissamut sakkut pingaarnersaattut akuerisariaqarlugu.

Naalakkersuisuniit unammilligassatta annikillisinnissaanut siuttooqataarusuppugut, siammasissumillu ataatsimoorussamik suleqataarusussuseqarluta. Ikiorneqarnissamut aqqutit pioreersut annertusarsinnaneri inerisarsinnaanerilu ammaffigaagut minnerunngitsumillu periarfissanik nutaanik ujartueqatigiinnissamut peqatiserinnilluta. Naalakkersuisuniit upperaarpud innuttaasut ataatsimoorluta angusassaq anguneqarsinnaasoq. Naalakkersuisuniit upperaarpud tamatta sumiikkaluaruttaluunniit tamatsinnut iluaqutaasussamik tunniussaqaarsinnaasugut.

----

Inuunitsinni inuttullu ataasiakkaatut inuiattullu siuariartuutissaqartilluta imminut qiviartuartariaqarpugut.

Innuttaasuusugut tamatta piginnaaneqarpugut. Tamatta assigiinngitsunik pikkoriffeqarpugut. Anaana ataatalu sulisappata meeqqerisut, ilinniartitsisut sunngiffimmilu susassaqtitsisut sulissapput.

Utoqqartagut isumassorneqartussaapput.

Nerisassaqassagutta piniartoqartariaqarpugut aalisartoqarlutalu pisaasalu sularineqarnissaanni sulisoqartussaalluni.

Pisiniarfimmiut angerlarsimaffitsinni pisariaqartitagut pisiassaatikkomallugit sulipput. Eqqakkagut initsinnilu innaallagialersuutigut atorneqassappata isumagineqartuartariaqarput.

Peqqilluta toqqissisimallutalu inooqataasinnaaqulluta peqqinnissaqarfimmiut ulloq unnuarlu sulipput.

Kikkuugaluartulluunniit annerunatik minnerunatillu nalingiillutik nunatsinnut siuariartortitseqataasinnaapput - Ullullu tamaasa sulinikkut inuppasuit maligassiullutik tamanna tunngavissittarpaat. Sulinermi pisuussutitta annerpaat ilagimmassuk.

Akornatsinni arlarput iluanaarpat, uatsinnut iluaqutissalimmik sunniuteqartussaavoq.

-0-

Inuuniitsinni ilaatigut naatsorsuutiginnngisanik nalaataqartarpugut ingerlariaqqinnissamullu allatut ajornartumik pisortaniit ikiorneqartariaqalersinnaalluta.

Inunnik sullissinermi tassani kommunit qitiupput. Kommunimmi tassaapput ulluinnarni innuttaasunik qanimut sullissisut.

Kommunini sulisut qinikkallu innuttaasut atugarisaasa pitsanngorsartuarnissaat pimoorussilluinnarlutik ingerlappaat. Inunnik sullissisuusut suliarujussuaq ilaatigut kiserliornarsinnaasoq kivittarpaat sapinngisartik tamaat atorlugu.

Inunnik sullissisuusut ulluinnarni tunniussaas pillugit qutsavissaqarfigeqaagut. Ulluinnarnili sulinerminni sinaakkusiunneqartut aallaavigalugit sulinerminni ilungersortitaapput tamannalu allanngortittariaqarpoq.

Naalakkersuisuniit ukiumi nutaami Nunatsinni inunnik isumaginninnikkut aaqqissuusaanerput nutarternissaanut suliaq aallartissavaat. Inunnik isumaginninnikkut sulinermi oqartussaaffiit ataqatigiissumik sulinerat annertusassavarput. Inuit ataasiakkaat nukiit piginnaasallu pigisaat

aaqqissuusseqqinnermi qitiutillugit sulineq ingerlanneqassaaq.

Suliffissaqarnermut aqputissiusinerit akileraartarnikkullu aaqqissuusseqqinneq suliarisariaqakkatsinnut ilaapput. Isumaginninnikkut, suliffissaqarnikkut akileraartarnikkullu nutarterinermi sulinerup aaqqissuunneqarnerani inuiaqatigiittut tamatta attuumassuteqarfigaarput.

Nutaamik aaqqissuusaaq taamaallaat iluatsissinnaavoq siammasissumik naalakkersuinikkut paaseqatigiiffiusumik ilusilersorneqarpat. Naalakkersuisuniit paaseqatigiiffissarsiorfiusumik ingerlaaseq atugarput ingerlateqqissavarput taamaaliornitsiugt innuttaasut peqataatilluarneqarsinnaanerata atugaasalu malunnaatilimmik pitsaanerulernissaat qulakkeerneqarsinnaammat.

Qularutiginnigilaralu inuit sullitagut pillugit paaseqatigiissinnaasugut. Nukigut siunertamat pitsaasumut kattullugit suliniarta. Qinikkammi aammami inuiaqatigiit tassaavugut, nunatta inuisalu siuariartortuarnissaanut suleqatigiittussat.

-0-

Nunarput pillugu tamatta takorluugaqarpugut. Takorluukkatta qiteraa tamatta nunarput inuuffigiuminarnerulersikkusukkatsigu.

Isuma tamanna imminermini nukiuvoq naak anguniarneranut aqputit isumaqatigiinnigissutaasinnaasaraluartut.

Piffissami aggersumi ikioqatigiinnikkut suliassaqarpugut. Nunatsinni mittarfissuit Inatsisartut aaliangernikuunerata tunngaviligaanik, suliarineqarlutik aallartissimalereerput, kujataanilu Qaqortumi aamma mittarfiliortoqassaaq. Atuutilerpata nunatsinni nunatsinnullu angallanneq allangorujussuartaavaavoq periarfissanillu nutaanik pilersitsissalluni.

Ukiumi nutaami mittarfissuit atuutilernissaannut suleqatigiilluta aqputissat periarfissallu nutaat inerisartariaqarpugut inoqarfinni tamani – Illoqarfiimmi mittarfittaartussat kisimik ineriartuutiginagu inuiaqatigiit tamarmik ineriartornermit tassannga iluaqutissinneqarnissaat pingaaruteqarmat.



Pingaarnepaavoq najugarisami namminerisamik pilersinneqarsinnaasut sorlaqartinnissaat taamaaliornikkut piginnaasat pigeriikkat atorluarlugit inerisaasoqarsinnaassammat.

Nunatsinni nukiit, ilisimasat, ilinniartitaaneq aamma aningaasat kaaviaartut amerlisikkumallugit suliniarnerput aallutissavarput naligiinnerusumik inuuneqalersinnaajumalluta.

Nunatsinni sumiiffinni amerlanerpaani takornariaqarnermut piginnaasallit piupput. Piginnaasat aallaavigalugit Nunatta tikikkuminarsarnissaanut suliat suleqatigiissutigalugit aallartisartariaqarpagut nunarput assissaqanngitsoq avatangiisinut akisussaassusilimmik misigisassarsiorfigisinnaanngortikkumallugu.

Misilittagarilikkagut tamatsinnut pitsaasumik sunniuteqarsinnaanngoqqullugit inuiattut imminut napatissinnaanngornissarput anguniarlugu suleqatigiissaagut.

-0-

Aalisarnek piniarnerlu nunatsinni pikkoriffigaarput. Nunatsinni aalisarnek isumalluutitta pingaarnersarisaanni siuariartornissarput pisariaqartipparput. Inuiaqatigiinni siunertagut pitsaasut angussagutsigit aalisarnikkut inuussutissarsiuteqarnitta pikkoriffigisattalu ineriartortinnissaa pisariaqartipparput.

Inuussutissarsiut pingaaruteqartoq pillugu qanoq siunissami aaqqissuunneqarsinnaanera nalilersuineq aalisarnermit susassaqartunit ukiaq saqqummiunneqarpoq. Nalunaarusiaq siammasissumik oqaluserineqarnissaa nalilersuinermilu akuutitsinissaq pingaartueqarluinnarluni.

Ukiumi nutaami aalisarnek pillugit isumasioqatigiinnerit ingerlanneqassapput inuussutissarsiutsinnut pingaaruteqartumut inuiaqatigiit oqaloqataanissaat periarfissikkumallugu.

Aalisarnerulli aaqqissuuteqqinneqarnissaa qanoq iluseqarumaarnersoq oqaloqatigiinnerit takutikkumaarpat. Pingaarnepaarli tassaavoq aaqqissuusseqqinnerup maannakut inuutissarsiuteqartut pillugit

suliaassanngimmat kisiannili kingulissatta inuutissarsiuteqarsinnaanissaannik qulakkeerinnittussaammat.

Aalisarneq, takornariaqarneq avatangiisitalu atorluarneqarnissaat qulakkiissagutsigit Appolo-p Saatormiup oqaasii atorlugit aqcutip atugassatta qiterpiaa naatsumik imatut eqikkarneqarsinnaavoq:

“Kingullertut inuusutut piunnaartariaqarpugut.”

---

Inuiaqatigiittut ikittunnguuvugut, nunarujussuarmi siassimalluta inuusut. Tamanna tamatta nalunngilarput. Tamaakkaluartoq Nunarput nunarsuarmioqatigiinnut annertoorsuarmik sunniuteqarluartumillu tunniussaqaarsinnaavoq, aamma tunniussaqaartarpoq.

Nunatsinni avatangiisitta pisinnaasai qiviartigit, silap pissusaata tunniussinnaasai.

Nukissiuuteqarnermik imminut akilersinnaasumik napatissinnaalluarpugut. Nukinnik sinnilinnik peqarpugut nunatta inuussutissarsiornikkut iluaqutissaanik. Ataavaartumik nukissiuuteqarneq erngup nukia atorlugu nunarsuarmioqatigiit nukissiuutiminnik allannguiniarnerannut tunniussassaqaarpugut niiverutaallualersinnaasumik.

Naalagaaffippassuit nukissiuutit ataavartunik minguinnerusunillu atuinissamik anguniagaqanerat nunatsinnut siuariartornissamut periarfissiivoq. Nunarsuarmioqatitta kinguaassamik nerisassaqaartuarnissaat inuuffissaqaartuarnissaat pillugu silap pissusaata inuit pilersitaannik kissakkiartuaartinneqarnera annikillisarlugu iliuuseqarput.

Nunarsuarmiut nunarsuatsinnut mianerinninnerusumik inuuneqarusunnerat uagut iliuuseqarnikkut peqataaffiginiartigu. Issittup inuisalu avatangiisimut mianerinnittuunerat nittarsaanniartigu Kalaallit Nunarpullu nunat minguinneraattut inuutissarsiornikkut inissillugu.

Siunissami nunatut naalagaaffinngorumaartussatut nunarsuarmioqatigiinni suleqataasinnaanerpugut maanna takutinnissaanut periarfissaqaarpugut.

Takutitsigu nammineerluta nunatta ineriartortinneranut nunarsuamioqatigiinnut akisussaassusilimmik aaqqissuukkipput. Avangiisigut mianeralugit atorluarlugit aalisarnikkut, takornariaqarnikkut, nukissiuteqarnikkut aatsitassarsiornikkullu ineriartorsinnaavugut nunarsuarmioqatigiit isumaqatigiissutaat peqataaffigalugit.

Nunarsuarmioqataanermi tunniussassaqaarneq sunniissinnaanerlu inuiaattut amerlassutitsinniingilaq iliuuserisinnaasatsinniillunili.

-0-

Naggasiutigalugu oqaatigerusuppara inooqatigiinnitsinni immitsinnut ikorfartorlotalu nukissamik aallerfiguartaariaqartugut.

Inuiattut inooqatigiinnerput ataatsimoorfissaqarpoq, ataatsimoornerunikkut inuiattut sulit nukittunerulernissarput tunngavissitsigu.

Inuiattummi ataatsimoornerissarput, tapersorsoqatigiinnissarput nukittorsaqatigiinnissarpullu aatsaat taamak pingaartigilerpoq.

Ataatsimoornerissigut tapersorsoqatigiinnitsigullu aatsaat, inuiattut unammilligassavut aammalu avatitsinnit, nunatsinnik issittumillu soqutiginninnerujussuaq pissaanilissuarnit pissaaneqarniuffiulersimasoq, akiorniassallugit aaqqiissutissanillu nassaarfigigalugit anigorsinnaavagut.

Ileqqut kingornuttagaapput. Anaana, ataata inersimasullu imminnut qiimmassaqatigiittut tapersorsoqatigiittullu meeqqatsinnut takutittuarutsigit, qiimmassaqatigiinneq nersualarinninnerlu inuiattut naleqartitatut pilersissavagut.

Timikkut, tarnikkut anersaakkullu pikialaartitsillutillu nukissamik tunioraasuusut qiimmassartuartigit, uagut piginnaasarinngisatsinnik piginnaanillit nersualaartartigit. Ataasiakkaarluta ataatsimoorluta nukittuffigut tunniussinnaasavullu inissaqartillugit.

Qutsavigisigit meeqquerivinni sulisut, ilinniartitsisut, sunngiffimmi ornittakkani sulisut, utoqqaat illuani isumassuisut napparsimasunillu paarsisut.

Aalisartut piniartut nunaqqatigiit naleqartitatsinnik nerisaqartikkumalluta inuiattullu napatikkumalluta ullorpassuarni piniarlutik angalasartut.

Qutsavissaapput kattuffiit nunatsinni uummaarititseqataallutik suleqataasut, ilissittaaq tamassi nunarput pillugu sulisusi suleqataanissinnut qujanaq.

Minnerunngitsumi sinerissami inuit kajumissutsiminnik suleqataasorpasut: Qujanaq pilluta suligassi, nukissamik annertuumik nunaqqatitssinnut tunniussivusi.

Qanortoq ukioq tamatsinnut 2022 iluanaarfiugili.

Ukiortaami tamassi pilluaritsi.

Guutip Nunarput sernigiliuk.

**Kilde**

naalakkersuisut.gl

**Kildetype**

Digitalt manuskript

**Tags**

Nytårstale

**URI**

<https://www.dansketaler.dk/tale/mute-b-egedes-nytarstale-2022>